

01.04.2020. 15:00

# Direktor Đenan Salčin održao sastanak s tužiocima i Ericom Nelsonom - Saopštenje za Raport.ba

Saopštenje za javnost Agencije za javne nabavke BiH u kojem upozorava da je odmah nakon što su uvedene olakšice za nabavku medicinske opreme zabilježeno nekoliko zloupotreba, uznemirile su i probudile strahove javnosti da će se krađa na javnim nabavkama znatno povećati nego što je ona bila i prije vanrednog stanja.

## Mjere sigurnosti

Direktor Agencije za javne nabavke Đenan Salčin kazao je za Raport kako je nadležnost ove Agencije praćenje svih javnih nabavki.

“Kada ugovorni organ krene u direktni pregovorački dogovor ili onda kada se izuzimaju od člana 10, ali u oba slučaja moraju se ispoštovati mjere sigurnosti. Naprimjer, kako neki UKC ili Opća bolnica u Sarajevu hitno treba rukavice ili maske jasno je da će krenuti u hitni nabavku, ali ipak moraju donijeti odluku da koriste pregovarački postupak”, objašnjava Salčin.

On dalje navodi kako su do sada zabilježili 120 neregularnih postupaka, odnosno postupaka u kojima ima nelogičnosti.

“Kada uočimo nelogičnosti mi odmah šaljemo akt toj firmi da nam se izjasni u roku od 72 sata. Inače je taj rok 7 dana. Tek nakon što nam oni daju povratnu informaciju mi vidimo šta je bilo”, navodi Salčin.

On ekskluzivno za Raport otkriva da je danas održan i sastanak s predstavnicima svih tužilaštava i ambasadorom SAD u BiH Ericom Nelsonom.

“Dogovorili smo se da Agencija prosljeđuje nadležnim tužilaštvima materijale. Ako je prekršaj napravila firma iz Banja Luke onda tužilaštvu u Banjoj Luci, ako je u Sarajevu onda Tužilaštvu KS i ako je veću prekršaj onda i državnom tužilaštvu. Složili smo se da ćemo detaljno i ubrzano raditi na tim slučajevima, tamo gdje ima osnova za krivičnu odgovornost”, navodi Salčin.

## Kompleksno pitanje

Kaže da ne smije detaljno iznositi činjenice ali je naveo primjere da određene općine sad pokušavaju nabaviti građevinski materijal po hitnim procedurama, određene škole nabavljaju ogradu...

“Ne izgleda kao da je to hitno i da se mora zakon preskakati. Zašto će školi sad hitno oграда? Ja kažem, jedino ako nas zombiji napadaju”.

Salčin dalje ističe kako Agencija svaki dan dobije ogroman broj pijava od ponuđača.

“Dom zdravlja nabavlja aparat za hemodijalizu. Sad mi moramo ispitati da li je to zaista neophodno sad bilo da se nabavlja preko olakšica. Sve je to dakle kompleksno. Ipak, a to smo dogovorili i sa ministrom sigurnosti Fahrudinom Radončićem, mi ćemo raditi na tome da niko ne može iskoristiti ovu krizu da se obogati ili stekne neku korist. To smo dogovorili i na ovom sastanku s ambasadorom Nelsonom”, naveo je Salčin.